

平度志要

四學校

學校

謹案唐開元二十六年詔天下州縣皆置學戟門內西壁嵌宋政和五年詩碣則州學自唐始可推而知也金元有明代常修葺豐碑林立其詳其慎尤可慕者崇禎十二年知州杜志攀方修學官城南洪溝十一歲樵子吳德兒掘樹得銀二十一兩五錢戴以呈州志攀令齋學助工德兒又戴銀獻先師之墀四叩首而去是孰使之然也此可以見人性之善而聖教之信孚豚魚為有徵矣廟廷禮儀前志已詳伏讀

御書大成殿扁額

聖祖仁皇帝欽頒萬世師表
世宗憲皇帝欽頒生民未有
高宗純皇帝欽頒與天地參
仁宗睿皇帝欽頒聖集大成
宣宗成皇帝欽頒聖協時中
文宗顯皇帝欽頒德齊疇載
穆宗毅皇帝欽頒聖神天縱

今上欽頒斯文在茲明倫堂屏風知州許榘八分書大學聖經一章惟列朝存學書籍今俱佚道光二十一年知州許榘學正史護訓導李潤修設祭器樂器今亦十無一二前志明洪武十五年設學田五頃六十畝九分三釐每年徵解提學租銀十六兩五錢二分四釐六毫

萬曆五年知州傅霖捐置西南鄉贍田六十九畝十九年知州汪會海捐置供饋學田四頃分寄各社康熙十五年知州唐宗堯捐劉灣莊學田二頃四十畝為義學館穀四十二年知州舒士貴捐置都家疇義學田一頃四十畝四分合傅霖前後四任共捐八頃四十九畝四分實在學田西南廂地六十九畝五分一釐六毫張舍地四十六畝六分楊召社地五十九畝五分徐官莊地三十八畝沙梁社地三十四畝七分一釐八毫合實在學田二頃四十八畝三分三釐四毫再合洪武十五年共十六頃五十八畝六分六釐四毫今查學官交代冊止洪武十五年五頃六十畝九分三釐核入交代至傅霖前後四任八頃四十九畝四分無存實在二頃四十八畝三分三釐四毫亦無存年代久遠地畝迷失理或有之除傅霖前後四任所捐不計外惟洪武十五年學田一釐無缺而道光二十九年實在學田一釐不存再五頃六十畝九分三釐內有貧生十名認種三十九畝核入交代又查有大禮生四名每名四畝共十六畝學署亦無冊可稽蓋均不可問矣學宮內外諸門莫不洞敞鎖鑰無存櫺星門僅存石砬光緒十八年十二月朔旦

爾延

釋菜訖進謁兩廡見少木主十九尊名宦鄉賢有主無座警惕

戰慄汗流浹背敬謹修主補入嚴杖捕役獲賊枷責尋亦瘳斃廩生三十名增廣生三十名附生歲科原額取十二名嘉慶十四年增三名為十五名撥府一二三名無定額咸豐十一年同治六年

兩次捐辦軍需至五萬餘緡未請加額加以人文日起應試者每至千五六百人被遺士子向隅者多自同治七年起每歲試撥府七名科試撥府五名相沿日久著為定額乾隆二十四年知州王化南擇州城西偏唐圓明廢寺遺址改建膠東書院道光十三年知州李天錫捐廉一千緡發當一分取息繳院以充膏火咸豐十一年捻幅肆擾典當多收閉歇業僅餘一百七十千有奇仍按月一分取息繳院光緒十一年知州彭履謙又因裁撤海防練勇所餘經費五千緡發當一分取息繳院十三年濟東泰武臨道李宗岱捐銀一百五十兩合錢四百七十四千有奇發當一分取息繳院十四年知州許頌鼎捐廉一千緡發當一分取息繳院總合諸項歲入息錢不足京錢一千四百串山長脩膳聘禮歲用四百餘千監院薪水八十千每歲二月開課六月停課七月開課十一月停課每月官齋扃門兩課官課生獎三十名童獎四十名齋課生獎二十五名童獎三十名兩課獎一百二十八千又超等上取加獎無定額每課四百餘人皆給點心卷貲六七十千不等每歲共需一千六七百緡入不敷出爾延莅任以來惟思振作人才為政至要每月加課為一月三課凡不敷之項皆捐廉自備外復有地二頃九十三畝六分所入租項解本府入北海書院城鄉義學六十一塾均由印官捐廉自備知州吉燦升捐京錢六千緡三年取息為鄉試之需後之莅斯土者其留意焉

